



UKA 2015/147  
7. oktober 2015  
Aqqaluaq B. Egede

**Uunga siunnersuut: Kalaallit Nunaannut suliffissarsiortut killilersimaarnissaat pillugu Inatsisartut inatsisaata allannguuteqartinneqarnera pillugu Inatsisartut inatsisaat nr. xx yy 2015.**

**(Sulisitsisut suliffissanut nittartakkamik atuinissaat)**

**(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)**

Kalaallit Nunaat tamakkerlugu sulisitsisut suliffissanut nittartakkamik atuilernissaat Inuit Ataqatigiit aallaqqaataaniilli qularnartoqartissimavaat. Isumaqaataavugut suliffissarsiuussisariup sulinera ataqatigiinnerusumik aaqqissuunneqarnissaa pisariaqartoq, kisiannili qularaarput tamanna sulisitsisut suliffissanut nittartakkamik atuilerneratigut aaqqiiffiqineqarsinnaasoq.

Tusarniaaneriit akissutaat atuarneratigut takuneqarsinnaavoq uagut kisitta qularinninngitsugut. Ilaatigut apeqquserneqarpoq qanoq annertutigisumik unammillersinnaaneq innarlerneqassanersoq, taassumalu saniatigut qularnartoqartipparput kommunit suleriaatsiminnik allanngortitsinissartik piareersimaffigineraat.

Isumaqarpugut aningaasat ukiumoortumik inuiaqatigiinnut 1,2 millioninik naleqartussat pitsaanermik massakkut atorneqarsinnaagaluartut. Aningaasat taakkua tusagassiutinut tapiissutit naalakkersuisoqatigiinniit peerneqartut pilerseqqinneranut atorneqarsinnaagaluarput.

Taamaakkaluartoq Inuit Ataqatigiit inassutigissavarput siunnersuut Inuussutissarsiornermut Ataatsimiititaliami suliarineqassasoq. Periarfissikkumagatsigu partiit naalakkersuisullu akunnerminni isumaqatigiinniarsinnaanerit. Aamma aningaasanut inatsit pillugu isumaqatigiinniarneriit suli ingerlammata periarfissatsialaammat ammasumik naaperiarfissarsiornerisartut qulakkeerumagatsigu.